



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

Symbolum LXVIII. Vlysses Palamedem fraudulenter circumvenit.

[urn:nbn:de:hbz:466:1-68709](#)

SYMBOLVM LXVIII.

Vlysses Palamedem fraudulenter circumvenit.

Homerus loc. citat. Aeneid. l. 2.

Ethicè.

1. Invidia perdit viros bonos. 2. Lingua pseudopolitica.

Suprà memoravimus fictitiam Ulyssis insaniam fuisse à Palamede manifestatam, objectō aranti Ulyssi eius filiō; hinc prima odii scintilla. Altera conflata est ex frumentatione. Nam cùm à Græcis Ducibus Ulysses in Thraciam frumentatum missus esset, & nihil inde attulisset; Palamedes eódem ablegatus, plurimum frumenti advexit. Quemobrem Ulysses invidiæ stimulis agitatus, adulterinam Priami Regis Trojanorum nomine epistolam scribit, in qua proditionis gratias agebat Palamedi, commemorabátque secretum auri pondus esse transmissum: id quod ipse Ulysses, per corruptos servos, in tabernaculo eius defodí curárat. His litteris in concilio Græcorum recitatis, Palamedes proditionis accusatur. Ibi Ulysses reo adesse simulans, hostilibus litteris nihil fidei habendum contendit: eásque re ipsa facile fraudis posse coargui, si Palamedis tentrium perscrutarentur: in quo si aurum reperiretur, nullum ipsum supplicii genus recusare. Missi itaque ad tabernaculum scrutandum, dum omnia vafre explorant, etiam terram eruunt, & inveniunt aurum infossum. Palamedes veluti proditionis convictus, lapidibus obruitur. Vir fuit ingenio, manuque strenuissimus: plerasque litteras alphabeti Græci repetit; latrunculorum præterea lusum, & mensurarum ac ponderum ratios excogitavit; itémque calculos seu suffragia, quibus in deliberando, judicandoque utimur, invenit. Insuper peritus Astrologiæ fuit, annūmque ad cursum lunæ accommodavit: primusque in castris, visam atque reformidatam Solis eclipsin, naturalem miniméque timendam esse docuit. Ordinem quoque aciei, & tesseras, hoc est, Symbolum bellicum, & vigilias adinvenit. Quæ omnia à gruibus avibus fertur didicisse. Illæ enim non nisi acie instructæ volant, electo duce, quem sequantur; depositisque in extremo agmine, qui gregem voce contineant, & qui noctu, cæteris dormientibus excubias agant. Inter volandum etiam mutatis subinde ordinibus, litteras quasdam videntur effingere: quas etiam primus ab

Eee

eis

eis observasse fertur Palamedes. Hinc grues, aves Palamedae dicuntur. Post interitum eius Græci ipsum flevere, & non sine suspiriis desiderarunt; qui & in tragedia Euripidis de eo recitarunt hos versus.

ἐκάνετο ἐκάνετο τῶν Ἑλύων ἀριστῶν, τὸν οὐδὲν
ἀλγόντων αἰδοῖς μηδέν.

*Interfecisti, interfecisti Græcorum
Optimum, nemini nocentem, lusciniane
Musarum.*

Et Virgil. 2. Æneid.

----- quem falsa sub proditione Pelasgi
Insontem infando judicio, quia bella vetabat.
Demisere neci; nunc cassum lumine lugent.

Ethica.

I. (a) Causa exitii Palamedis, invidia fuit, de qua disertè sanctissimus Pontifex Gregorius Nyssenus, in lib. de octo beatitud. inter alia ait: videtur mihi invidia atque simulationis vitium, irâ multò gravius esse: quantò occultum malum etiam apertô atrocius est. Etenim ex canibus eos magis cavemus, quorum neque latratus iram præsignificat, neque ex adverso incursum est: sed miti pariter ac mansueto habitu, non prævidentes, neque circumpcientes nos observant. Verè Plinius lib. 31. c. 2. Periculosiores, inquit, sunt fontes, qui limpidis aquis blandientes, oculis tamen perniciem afferunt; minus formidandi, qui ipsa specie testantur aquas esse fugiendas. Difficilius vitantur mala, quæ boni prætextu fallunt.

Antigonus Rex Diis sacrificans, precabatur, ut se à simulatis servarent amicis: cùmque percontaretur quispiam, quamobrem tale quid à Diis optaret: *Quia* inquit, *hostes*, cùm cognosco, cayebo. Juxta Magni Leonis dictum. *Plus plerumque periculi est in insidiatore occulto, quam in hoste manifesto.* Insidiator est, qui sub amici fronte, inimicum intus alit, qui amorem oculis, fronte, verbis loquitur; odia pectore circumfert, quæ, opportunitatem nactus, effundat in nimis credulam mentem. In hunc quæ robora sufficient? quæ prudentia satis caveat? Incauta ferè generositas est. Et, quod fortior quisque, quod animo celsiore (qualis erat Palamedes) hoc magis insidiis patet, ex se enim cùm metiatur omnes, candorem suum legit in omnibus; nec metuit dolos, quibus caret, ignoratque insidias, quas nullas defert, nulli parat: indignas enim arbitratur viro

forti

(a) *Invidia malum perdit viros bonos.*



fōrti fraudes; & dolis se tegere, cūm viribus possit, ignavissimi pectoris esse putat. Hanc malignitatem scelusque nefarium objecit Ajax Ulyssī, in illa nobili Achilleorum armorum petitione. 13. Metam. Dictys Cretensis de Palamedis nece sic scriptum reliquit. Per id tempus Diomedes & Ulysses consilium de interficiendo Palamede ineunt, more ingenii humani, quod inbecillum adversū dolores animi, & invidiæ plenum, anteiri se à meliore, haud facile patitur. Meminit huius Palamedis injustè occisi etiam Socrates apud Xenophontem in Apologia. Non enim mihi (quod innocens moriar) sed condemnantibus hoc turpe: solatur autem me & Palamedes ille, non dissimiliter condemnatus, cui majores laudes ex iniuria Ulyssis obvenerunt. Nimirum invidiæ filia est calumnia, hæc op̄ primit innocentiam. Siracides cap. 28. *Multi ceciderunt in ore gladii, non sic quasi interierunt per linguam.* Id est, plures occidit lingua maledica, calumniatrix, insidians, necem machinans, quām gladius: nam illa vitam simul ac famam, falsè criminando aufert.

II. (b) Artes pseudopoliticas egregiè vespellis Ulysses expressit. Horum hominum lingua, dolosus ignis est, sub quieto cinere; falsa, simulata, insidiosa pax; malacia in occasionem ultionis intenta: umbra fœderum, multis, officii ostentatione blandiens simul, ac sæviens. Symbolum linguæ huius politice est hoc. (c) Crocodilus tergo insidentem vehit felem, addita hac inscriptione: *Fleamus & mulcemos, ut fallamus.* Nam Crocodilus antequam hominem invadat, & glutiat, lacrimas emittit. Et felis insidiosum & astutum animal, nunc pedes lambit, nunc pelliculam linguā extergit, nunc pectus aut tergum polit, séque totam assidue comit, nihil ut illā sit cultius atque comptius; semper tamen armatos habet ungues, & ad nocendum paratos. Talis Ulysses fuit, tales etiam hodie, præsertim in aulis Principum frequentes Crocodili & feles occurſant, ubi invidia quotidiana, plurimæ assentandi & calumniandi occasionses; alii in alios varias nocendi vias comminiscuntur, & sub veri specie, *Veritas* opprimitur. *Venenum aspidum sub labiis eorum.* Ait expertus Vates psal. 13. In aquis latet crocodilus, anguis in herba; in aulis lingua; quæ quō est dulcior, hoc est virulentior. Monet Sapiens Proverb. 2. *Ut eruaris à via mala.* Cuius? qui perversa loquitur. *Qui relinquunt iter rectum & ambulant per vias tenebrosas.* Sic ambulant illi, qui aliud corde clausum, aliud ore promptum habentes, per tortuosas ambages quærunt, quem, quod diabolus (id est calumniator) facit, devorent. Tali homini in os ingeras, quod Maronianus pastor suo contribuli:

Eee 2

Ets

(b) Lingua pseudopolitica. (c) Crocodilus.

Etsi non aliquà nocuisset, mortuus esset. Eclog. 2.
Id Ulysses propositum sibi habuit : id effectum dedit. Siracides c. 6.
monet: *Ab inimicis tuis separare, & ab amicis tuis attende.* Maxima sunt enim in ipsis amicitiis insidia. Hinc illud Poëta:

Fallere difficile est inimicum : at amicus amicum

Fallere non magno Cyrne labore potest.

Antigonus Rex , teste Plutarcho , quotidie Deos rogabat , ut se ab amicis protegeret : roganibus , cur non potius ab inimicis , respondit : *Quia hos cognitos vitare possum : illos verò fictos & fucatos cavere non possum.* Tu igitur ne fide ; serpentibus cincti sunt amici falsi ; venena spargent : ne crede fronti , nunquam magis nocent , quād dum blandiuntur , rident ? sanguinem meditantur. Laudant ? damnant animo , insidias intentant. Consilia suggerunt ? ne tange , in interitum eunt. Fuge lupos sub ovili pelle , illabuntur suaviter , & antē vulnerant , quād dentem senseris.

S Y M B O L V M L X I X .

Vlysses Polyphemum Cyclopem exoculat.

Aeneid. 3. Metam. 13. Homerus lib. 9. Odys.

Ethicè.

1. Ingenium præstat robori. 2. Somnolentia & negligentia pastorum. 3. Cyclopis donum quale. 4. Crudeles tyranni.

Cyclopes Neptuni & Amphitrites filii , ministri Vulcani , Jovi sua fulmina , Neptuno tridentem , Plutoni galeam , heroibus arma fabricabant. Dicti sunt ab unico oculo , quem in media fronte habebant. Incoluerunt eam Siciliæ partem , ubi mons Ætna flamas ejaculatur. Immani sunt barbarie , & proceritate portentosa. Inter hos , ut vastitate corporis , sic atrocitate animi eminebat *Polyphemus* , Monstrum horrendum , informè , ingens , cui lumen ademptum.

In quo voracitas cum crudelitate certabat.

Trunca manum pinus regit , & vestigia firmat :
Lanigeræ comitantur oves ; ea sola voluptas ,
Solamēque mali , de collo fistula pendet.

Pastorem

